

Hof kier manda señal bon cla pa stop corrupcion

Paul Croes condena na 3 aña di prison y 8 aña no por postula como politico y tampoco traha den Gobierno



ORANJESTAD (AAN): Diamars merdia via video conference Hof di Corte Superior na Curacao a dicta sentencia den e caso apelacion IBIS. Luna pasa tratamento di e caso a tuma lugar y a keda palabra cu ayera tin sentencia. Ta asina cu Wever ta e unico cu no a presenta. DIARIO ta publica e exigencia di Procurador General (PG) luna pasa, compara cu e sentencia di Hof.

Hof a rechaza e defensa hiba cu a viola e ley di derechonan humano (EVRM).

PAUL CROES CONDENA
Paul Croes: PG a exigí pa confirma e castigo di 4 aña di prison y 9 aña sin por actua como politico. Tambe PG a exigí pa detene Paul Croes di biaha ora Hof duna sentencia.

Hof a muestra cu como minister, Paul Croes a malusa su funcion pa dispensacion di permisonan. E tabata pasa riba nengamento di permiso di e departamento concerni y tabata duna permiso tog. E fundacion Excelence a haya hopi placa di comerciantenan pa asina regla permiso.

Hof tambe a muestra cu Paul Croes a laga drenta Aruba un muher ilegal pa cuida su yiu-nan. Hof ta haya Paul Croes culpable di e acusacionnan. Pa cu e castigo, Hof a tene cuenta cu door di e caso aki, a afecta Paul Croes hopi y cu e no tin bida politico mas. Sinembargo Hof no ta mira esaki motibo pa baha castigo.

Hof a condena Paul Croes na 3 aña di prison y 8 aña sin por ta politico y funcion den gobierno. Hof a rechaza exigencia di PG pa detencion di

Paul Croes di biaha.

MELONY CROES PAESCH

Croes Paesch, PG a exigí 120 ora di trabao, 16 dia di prison, 3 luna di prison condicional y 3 aña di prueba.

DECLARA LIBER DI LABA PLACA

Hof ta haya cu un parti di labamento di placa so a wordo trata. Esaki ta relaciona cu e negoshi di Croes Paesch. Hof no ta haya proba cu a laba placa. Hof ta haya cu Croes Paesch ta culpable di a laga drenta un muher ilegal pa cuida nan yiu-nan. Hof a bisa di ta tene cuenta cu e caso aki a afecta e pareha Croes nan bida hopi. Hof a declara Croes Paesch liber di laba placa y a condena Croes Paesch pa a laga e muher ilegal drenta na 120 ora di trabao pa comunidad y si no cumpli cu esaki e lo mester bay 60 dia sera.

NUÑEZ

Hof ta haya cu Nuñez como tramitador a cumpra Paul Croes pa dispensacion di permisonan. PG a exigí 240 ora di trabao of 120 dia di prison, 4 luna di prison condicional y 3 aña di prueba.

Hof a condena Nuñez na 4 luna di prison condicional cu 3 aña di prueba. Tambe Hof a condena Nuñez na 150 ora di trabao pa comunidad y si e no cumpli cu esaki e lo mester bay 75 dia sera.

DI VECCHIA

Hof ta haya cu Di Vecchia a duna Paul Croes prijs special pa por haya permiso. Di Vecchia a duna un descuento di mas di 2 mil florin. Ta asina cu PG a exigí 40 ora di trabao, 2 siman di prison condicional cu 2 aña prueba of 20 dia di prison.

Hof ta haya e exigencia di PG exagera. Hof a condena Di Vecchia na 2 siman condicional y 3 aña di prueba.

WEVER

Den caso Wever ta asina cu PG a exigí 5mil florin di cual 2500 florin ta condicional cu



3 aña di prueba. Hof ta haya cu no a keda proba cu Wever a cumpra Paul Croes pa haya permiso. E hecho cu Wever a haci donacion chikito na Excelence pa campaña no ta relaciona cu dunamento di permiso. Hof a declara Wever liber.

MARTINUS

Hof ta haya cu Martinus ta wordo declara liber mescos cu PG a pidi. Hof a muestra cu Martinus a cumpra carhi-

nan pa concierto manera e sa haci mas biaha. Hof no ta haya cu esaki tabata pa move Paul pa haya permiso. Hof ta confirma sentencia cu ta declara Martinus liber.

Hof a muestra cu e sentencia di Paul Croes ta pa manda un señal bon cla cu no ta permiti cu ministernan of empleadonan di Gobierno ta laga nan mes wordo cumpra. Hof ta haya cu mester para e forma di corrupcion aki.